

Museonan: construyendo comunidad” ta tema di Dia Internacional di Museo

ORANJESTAD - Awe, 18 di Mei, ta Dia Internacional di Museo. E fecha aki ta ser celebra rond mundo y ta un iniciativa di ‘International Council of Museums’.

E tema di e aña aki ta enfoca riba e esencia di e definicio di un museo cual ta sirbi comunidad y su desarroyo. Museonan ta ser considera parti importante den formacion di un identidad nacional. Comunidad ta confia museonan pa cuida y studia nan herencia cultural y pa transmiti informacion tocante e herencia aki na bishitante y habitantenan nobo di e pais.

Na un museo diferente grupo den comunidad ta topa cu e entendimento comun di intercambia interes y conocimiento tocante e obhetonan den un museo y e informacion nan tras. Desarroyo di e conocimiento di comunidad pa cu e.o. su historia, arte y naturalez ta

trabao importante di museonan.

Aki na Aruba, Museo Historica Arubano, Museo Numismatico y Museo Arqueologico ta colaborando estrechamente cu otro ya pa varios aña. A organiza exposicion, caminata y otro actividadnan hunto pa duna publico oportunidad pa conoce e trabao di un museo y parto do Aruba su herencia cultural.

Museo Historico Arubano actualmente tin un exposicion temporario titulá ‘Logro di pasado, reto pa futuro’. E exposicion aki ta cubri cierto aspectonan di nos historia, folklore y di nos Aruba moderno. Plannan pa un exposicion permanente nobo pa Museo Histórico ta den desarroyo. E exposicion permante nobo aki lo mester ta un refleho di e Aruba di siglo pasá.

Museo Numismatico ta trahando pa pronto nan por haya un localidad digno di e coleccion cual Mario Odor

(q.e.p.d.) a forma cu hopi dedicacion pa su Aruba stimá.

E diferente programa y actividadnan educativo/recreativo cu Museo Arqueologico Aruba a bin ta organiza e ultimo añanan aki a haya un bon aceptacion den comunidad. Principalmente scolnan pero tambe gruponan di vakantie y diferente otro grupo di comunidad ta acudi na actividadnan di Museo Arqueologico.

Museonan di Aruba pues ta trahando cu tur medianan disponibel pa cumpli cu nan tarea di sirbi comunidad. Ta esencial pa comunidad apoya museonan y duna nan e balor cu nan tin como guardian y promotor di cultura. Dia Internacional di Museo ta un bon oportunidad pa refleha tocante e rol cu Museonan mester tin den comunidad. Esnan interesa pa sa mas di e tema aki por bishita e website di Consejo Internacional di

Museo: www.icom.org

CELEBRACION

Diadomingo awor for di 10’or di mainta pa 2’or di merdia Museo Historico Arubano, Museo Numismatico y Museo Arqueologico Aruba lo celebra Dia Internacional di Museo cu publico na Fort Zoutman.

E exposicion ‘Logro di pasado; reto di futuro’ lo ta habrí y entrada lo ta gratis pa tur hende. Diferente instancia cu ta representá den e exposicion manera Parke Nacional, Centraal Bureau

Statistiek, Monumentenburo lo ta presente pa duna un splicacion.

Lo duna esnan presente un demostracion di con pa traha flie, muchanan lo por traha puzzel y lo tin musica y algo pa refresca pa tur esnan presente. Publico ta ser cordialmente invita pa asisti riba e dia aki.

En conexio cu Dia Internacional di Museo, e tres museonan ariba menciona lo ta será pa publico awe, pa esnan cu ta traha den e area di museo tin un dia special cu charla y excursion.